

Bagaimana raptai akhirat kita?

Mampukah nanti menghadapi Raja segala Raja

BERPENUH, gementar, takut, risau dan gelabah. Tak tahu bagaimana langkah yang harus diatur, bila masanya kepala perlu menunduk hormat, bila masanya tangan perlu dihulurkan dan apa ucapan yang perlu dituturkan setelah anugerah kebesaran disambut tangan. Hati pastinya menyesal seraya berkata:

“Mengapalah aku tidak dipanggil untuk raptai terlebih dahulu?”

Bayangkan bagaimana jadinya jika pada saat akhir anda diarahkan menggantikan orang lain menerima anugerah kebesaran daripada Yang di-Pertuan Agong tanpa raptai?

Jiwa tambah bergetar apabila diberitahu upacara yang anda hadiri bakal disiarkan secara langsung di televisyen ke seluruh negara.

Dalam banyak urusan besar di dunia, raptai memang sangat diperlukan bagi mengelak kesilapan yang bakal mengaibkan diri atau melanggar protokol majlis.

Dalam dakwah pun kadangkala perlu ada raptai. Lihat sajalah bagaimana Nabi Musa a.s. diraptaikan dengan dua mukjizat besarnya sebelum berhadapan dengan Firaun.

Mengapa perlu raptai? Jika tiada raptai, sudah pasti Nabi Musa a.s. akan bertempiaran lari terlebih dahulu apabila tongkatnya bergeletik bertukar menjadi ular ajaib. Jika baginda membuka langkah 1,000 kerana terkejut dengan mukjizatnya, maka cacatlah seruan dakwahnya. Lalu bukan Firaun mendapat hidayah, sebaliknya Musa akan diperlekeh Firaun sebagai si kecut perut. Lihat ayat ini:

“Dan (sekarang) campakkanlah tongkatmu (dia pun mencampaknya), maka apabila dia melihat tongkatnya itu (menjadi seekor ular besar) bergerak cepat tangkas,

refleksi al-quran

Oleh ABDULLAH BUKHARI
ABDUL RAHIM AL-HAFIZ

Pensyarah di Jabatan Tilawah al-Quran, Pusat Bahasa, UIAM dan Naib Presiden MURSHID.

seolah-olah seekor ular kecil, berpalinglah dia mlarikan diri dan tidak menoleh lagi. (Lalu dia diseru): Wahai Musa, datangkan ke mari dan janganlah engkau takut. Sesungguhnya engkau daripada orang yang beroleh aman,” (al-Qasas [28:31]).

Bagaimana pula gerak anda apabila menghadap raja segala raja di Padang Mahsyar kelak? Sesungguhnya raptai akhirat lebih utama dijalani. Membaca dan menghayati al-Quran yang sarat dengan berbagai peristiwa akhirat sebenarnya suatu signifikan raptai akhirat bagi orang beriman.

“Dan apabila engkau membaca al-Quran (wahai Muhammad), Kami jadikan perasaan ingkar dan hasad degki orang yang tidak beriman kepada hari akhirat itu sebagai dinding yang tidak dapat dilihat, yang menyekat mereka daripada memahami bacaanmu,” (al-Isra’[17:46]).

Tatkala orang yang

mengingkari akhirat berada dalam kegemparan apabila bangkitnya mereka dari kubur, orang beriman yang selalu membaca dan menghayati al-Quran akan berkata dengan tenang:

“Dan sudah tentu akan ditüpkan sangkakala (menghidupkan orang-orang yang telah mati; apabila berlaku yang demikian) maka semuanya segera bangkit keluar dari kubur masing-masing (untuk) mengadap Tuhan.

“(Pada ketika itu) orang yang tidak percaya akan hidup semula berkata: Aduhai celakanya kami! Siapakah yang membangkitkan kami dari kubur tempat tidur kami? (Lalu dikatakan kepada

mereka): Inilah dia yang telah dijanjikan oleh Allah Yang Maha Pemurah dan benarlah berita yang disampaikan oleh Rasul-Rasul!” (Yasin [36:51-52]).

Firman-Nya lagi:

“Huru-hara besar yang amat mengerikan (pada Hari Kiamat) itu tidak merunsingkan mereka, dan (sebaliknya) mereka disambut oleh malaikat-malaikat dengan berkata: Inilah hari kamu (beroleh kebahagiaan), yang telah dijanjikan kepada kamu (di dunia) dahulu,” (al-Anbiya’[21:103]).

Ayah semarakkan raptai akhirat dengan *tadabbur* al-Quran sempena Ramadhan yang telah berlalu meninggalkan kita.

KEPENTINGAN RAPTAI AKHIRAT

Persediaan untuk mengadap Allah, raja segala raja.

Memastikan berada dalam keadaan tenang semasa dibangkitkan dari kubur.

Membolehkan disambut dengan senyuman penuh mesra oleh malaikat.

Membolehkan amalan semasa di dunia diterima dengan tangan kanan, bukan kiri.

Memastikan diterima sebagai tetamu kehormat syurga.

TIPS: Semarak hidup dengan *tadabbur* al-Quran.

